

La marilenghe e jentre tal Stadi Friûl

Cun talian e inglês, ancje il furlan te segnaletiche, te comunicazion e tes ativitâts di intratigniment prime de partide in gracie di Udinese Spa, ARLeF e Comun di Udin

La societât Udinese Calcio Spa, il Comun di Udin e la Agenzie regionâl pe lenghe furlane a àn firmât un protocol di intese che al implemente la presince dal furlan dentri e fûr dal stadi, tes azions di comunicazion, ancje visive, de societât, di animazion prime de partide e di fidelizazion dai tifôs. Il protocol di intese - firmât dal president dal Udin Franco Soldati, dal sindic Furio Honsell e dal president de ARLeF Lorenzo Fabbro - al rapresente une azion impuartante di ricognossiment e di valorizazion de pluralitât linguistiche dal teritori sore che un criteri destinât a puartâ svilupps interessants tal cjamp dal marketing e de promozion.

La gnove esperience e svicine cun di fat la Udinese Calcio a ce che al è za stât sperimentât cun sucês in cetantis realtâts de Europe: par esempi, il FC Barcelona e l'Athletic Club Bilbao, che a son diventâts ricognossibii e plui interessants ancje par vie des lôr specificitâts linguistiche e culturâls. Il plan di azions che al fâs diventâ la Udinese Calcio Spa "uniche" e "speciâl" tant che il teritori plurilingâl che e rapresente tal panorame dal zûc dal balon talian e european, al proviôt la realizazion di cartelonistiche e di segnaletiche plurilingâl (talian, furlan e inglês) interne e esterne dal Stadi Friûl, l'ûs de lenghe furlane tes iniziativis promoziônâls, informativis e di intratigniment prime de partide e te polse, lis comunicazions di servizi plurilingâls, la presince de lenghe furlane tal sît internet dal Udin, te sezion dedicate ai tifôs e in sezions specifiche. Tal avignî e vignarâ studiade ancje la pussibilitât di fâ campagnis di comunicazion e di abonaments plurilingâls.

Il president de ARLeF Lorenzo Fabbro: *«In gracie di chest proget e de sinergie svilupade, il club plui impuartant de nestre Region, cognossût e preseât in dut il mont, al promovarà in maniere originâl e efficace i siei servizis e cussì al garantis il rispjet dai diris linguistics, rinfuarcint il leam cui tancj tifôs in Friûl e tal forest e, plui in gjenerâl, stiçant la atenzion de opinion publiche ancje a nivel talian e european. Lis lenghis e il sport - al va indenant Fabbro - a vuelin di atenzion ai valôrs, ae salût, ae valorizazion des diferencis, ae coesion sociâl e a fasin ben ai sportîfs e ai tifôs di ogni etât. L'impegn de Agenzie pal binomi lenghis e sport no si ferme ca, o volin lâ indenant tal rinfuarcî la presince de lenghe furlane in chest setôr».*



«O sin sodisfats e braurôs di vê dât il nestri contribût in chest percors li che, ognidun pe sô part ma ducj te stesse direzion, o sarin part

te difese, tal timp, di un ben prezios tant che la lenghe furlane». Cussì al comente il president di Udinese Calcio Franco Soldati.

Un festival che al conte la Europe multicultural

Suns Europe 2015

Dai 25 di Novembar ai 12 di Dicembar, il Friûl al è stât il centri de Europe «unide te diversità», in graciis di Suns Europe, il prin Festival european des arts performativis tes lenghis minoritariis. La storie di Suns Europe e scomence tal 2009 cuant che al è nassût Suns, il festival de cjançon in lenghe minoritarie indreçât aes minorancis talianis e a chês dal arc alpin. Suns al è cressût an daûr an, slargjant la sô aree di competence ae Europe Mediteranie.

Tal 2015, il program al à cjapât dentri no dome la musiche, ma ancje il cine, la leterature e il teatri. Un campionari pardabon siôr de vitalitât culturâl e de pluralitât espressive des produziions cinematografichis, leteraris e musicâls contemporaniis fatis intes lenghis des minorancis

linguistiche di Europe, cun autôrs, cines, musicisj e operadôrs di diversis areis: dal País Basc ae Carelie, de Corsiche ae Laponie, dal Friûl ae Galizie, de Ocitanie al Bashkortostan, dal Gales ai Grisons, de Bretagne ae Ladinie, dai País Catalans ae Groenlande e ae Irlanda.

Il festival al à ricevût il patrocini dal Segretariât gjenerâl dal Consei di Europe e la etichete Effe (*Europe for Festivals, Festivals for Europe*), assegnade aes manifestazions che si distinguin pe cualitât artistiche dal program e pal lôr impat significatîf a nivel locâl, talian e internazionâl.

Suns Europe al è un proget de cooperative Informazione Friulana, metût adun cul jutori de ARLeF e di Turismo Fvg e cu la colaborazion dal Comun di Udin, dal Teatri Gnûf "Giovanni da Udine", dal Cec di Udin, des associazions Bottega Errante e Il Laboratorio, de cooperative Punto Zero.

